

ԼԻԼԻԹ ԱՐՏԵՄՅԱՆԻ ՄԵՆԱՀԱՄԵՐԳԸ ՀԱՅՈՑ ՑԵՂԱՍՊԱՆՈՒԹՅԱՆ

100-ԱՄՅԱ ՏԱՐԵԼԻՑԻՆ



2015 թ. հոկտեմբերի 15-16-ին ՀՀ ԳԱԱ-ն և ԵՊՀ-ն գումարեցին «Հայոց ցեղասպանություն-100. Ճանաչումից՝ հատուցում» միջազգային երկօրյա գիտաժողովը, որի ընթացքում երկու նիստ անցկացրեց «Հայոց ցեղա-սպանության արտացոլումը արվեստում» մասնաճյուղը. լսվեց 20 զեկուցում:

Գիտաժողովի շրջանակում Կոմիտասի թանգարան-ինստիտուտում տեղի ունեցավ (15.X) ՀՀ ԳԱԱ արվեստի ինստիտուտի

Միյուռքահայ արվեստի և միջազգային կապերի բաժնի գիտաշխատող, արվեստա-խտության թեկնածու, միջազգային և հանրապետական մրցույթների դափնեկիր, տաղանդավոր դաշնակահարուհի Լիլիթ Արտեմյանի մենահամերգը:

Դաշնամուրային երաժշտության երեկոյի սկզբում արվեստագիտության դոկտոր, պրոֆեսոր Աննա Ասատրյանը իր ներածական խոսքում նկատեց, որ համերգը բացառիկ է իր տեսակի մեջ, քանի որ դրան մասնակցում են այն երիտասարդ կատարողները, որոնք զբաղվում են գիտական աշխատանքով:

Համերգն ուներ եռամաս կառուցվածք՝ «Կոմիտաս», «Հայոց Մեծ եղեռնի արտացոլումը երաժշտության մեջ» և «Վերածնունդ»:

Համերգի առաջին համարը Տիգրան Զուխաճյանի «Մահանվագն» էր՝ հայկական դաշնամուրային առաջին Marche funèbre-ն, որի կատարումը ձեռնարկեց Հայոց ցեղասպանության մեկուկես միլիոն անմեղ զոհերի հիշատակին: Ա. Ասատրյանը համառոտ ներկայացրեց պիեսի ստեղծման պատմությունը: «1884 թվականի դեկտեմբերի 7-ին Կ. Պոլսում վախճանվում է Կ. Պոլսի հայոց պատրիարք Ներսես Վարժապետյանը: 47-ամյա պատրիարքի վաղաժամ մահը ցնցում է տաճկահայերին, նրանց թվում՝ հայ դասական պրոֆեսիոնալ կոմպոզիտորական դպրոցի սկզբնավորող, հայ երաժշտության դասա-կան, հայ երաժշտական թատրոնի հիմնադիր և առաջին կազմակերպիչ, հանճարեղ կոմպոզիտոր, շնորհաշատ դաշնակահար, տաղանդավոր դիրիժոր, վաստակաշատ մանկավարժ, երանդուն երաժշտական-հասարակական գործիչ Տիգրան Զուխաճյանին:

Ուժերի ծաղկման շրջանում գտնվող գործչի մահը մեծ հարված էր՝ մանավանդ հաշվի առնելով այն հանգամանքը, որ Գևորգ Դ Մեծագործ կաթողիկոսի մահից (6.XII.1882) հետո նա ընտրվել էր Ամենայն Հայոց Կաթողիկոս:

Պատրիարքի վաղաժամ մահվան ազդեցության տակ Տ. Չուխաճյանը գրում է «Արտուրի Շիրիմ Տ. Տ. Մեծին Ներսեսի երիցս երանեալ Հայրապետին եւ Թուրքիոյ Հայոց Պատրիարքին Մահանուագը»՝ հայկական դաշնամուրային երաժշտության մեջ անդրանիկ *Marche funèbre*-ն: Պիեսը, որի ձեռագիրը գտնվում է Ե. Չարենցի անվան գրականության և արվեստի թանգարանում պահվող՝ Տիգրան Չուխաճյանի դիվանում, նույն թվականին էլ տպագրվել է:

Լիլիթ Արտեմյանը Տ. Չուխաճյանի «Մահանվագի» առաջին համերգային կատարողն է Հայաստանում: Ի դեպ, նա առաջին անգամ պիեսը նվագել է ՀՀ ԳԱԱ նիստերի դահլիճում տեղի ունեցած՝ «Տիգրան Չուխաճյանի կամերային ստեղծագործությունը» համերգի ժամանակ (12.XII.2012), Երիտասարդ հայ արվեստաբանների գիտական յոթերորդ՝ Տիգրան Չուխաճյանի ծննդյան 175-ամյակին նվիրված նստաշրջանի ընթացքում:

Կոմիտասի թանգարան-ինստիտուտում տեղի ունեցող համերգի հաջորդ երեք համարները ներկայացրեցին կոմիտասյան շարքը: Լիլիթ Արտեմյանի կատարմամբ՝ հնչեցին Կոմիտասի դաշնամուրային «Վեց պարերը» և «Գարուն ա» ժողովրդական երգի՝ Ռոբերտ Անդրեասյանի տրանսկրիպցիան: Լիլիթը կոմիտասյան շարքը եզրափակեց Հարություն Դելլալյանի «Նվիրում Կոմիտասին» երաժշտական դիպտիխով:

Համերգի միջնամասում պրեմիերաներ էին: Դրանք այն գործերն էին, որոնք գրվել էին Մեծ եղեռնի անմիջական ազդեցության տակ: XX դ. հայ ծովանկարիչ Վարդան Մախոխյանի (1869-1937) «*La Plainte de l'Arménie*» («Հայաստանի ողբը») երաժշտական պիեսը դաշնամուրի և ջութակի համար կատարեցին Լիլիթ Արտեմյանը և Կոմիտասի անվան պետական կոնսերվատորիայի երրորդ կուրսի ուսանող Գրիգոր Գյուլխանջյանը (դասախոս՝ արվեստագիտության թեկնածու Մարտուն Կոստանդյան): Ի դեպ, սույն գիտաժողովում Լ. Արտեմյանի զեկուցումը նվիրված էր Վ. Մախոխյանի «*La Plainte de l'Arménie*» ստեղծագործությանը:

Հաջորդ համարը դեռևս 1915-ին Ռուսաստանում տպագրված՝ Լ. Միմոնյանցի «ըպօպոփ» պիեսն էր, որի նոտաները Լ. Արտեմյանին տրամադրել էր Հայաստանի կոմպոզիտորների միության նախագահ, ՀՀ ԳԱԱ արվեստի ինստիտուտի գիտխորհրդի անդամ Արամ Սաթյանը:

Պրեմիերաների շարքում հնչեցին ստեղծագործություններ, որոնք գրվել էին եղեռնից ճիշտ 100 տարի անց: Հատկապես այս համերգի համար էր ստեղծվել ՀՀ արվեստի վաստակավոր գործիչ, արվեստագիտության թեկնածու, Հայաստանի կոմպոզիտորների միության անդամ, Երևանի Կոմիտասի անվան պետական կոնսերվատորիայի պրոֆեսոր Միխայիլ Կոկժանի «*Колокол не умолкнет никогда*» ստեղծագործությունը, որը

նույնպես կատարեց Լ. Արտեմյանը: Այնուհետև հնչեց Արվեստի ինստիտուտի գիտաշխատող, Հայաստանի կոմպոզիտորների միության անդամ, տաղանդավոր կոմպոզիտոր, երգեհոնահար և դաշնակահար Հովհաննես Մանուկյանի «Տեր մեր Հիսուս Քրիստոս. նա գալիս է» դաշնամուրային պիեսը՝ հեղինակի կատարմամբ: Այս ծրագրային ստեղծագործության մեջ նա Հայաստանը դիտարկում է որպես մարդկային քաղաքակրթության բնօրրան, սուրբ երկիր, որտեղից էլ պիսի սկսվի հոգևոր զարթոնքը:

Ա. Ասատրյանը համառոտակի ներկայացրեց սփյուռքահայ կոմպոզիտոր, դաշնակահար և մանկավարժ, պրոֆեսոր Արուսյակ Այնթապյանի ստեղծագործությունը, որը դեռևս անձանդթ է հայ ունկնդրին:

«Պատահական չէ, - նկատեց Ա. Ասատրյանը, - որ Այնթապյանի ստեղծագործության հայաստանյան պրեմիերան տեղի է ունենում հենց Կոմիտասի թանգարան-ինստիտուտի դահլիճում: Այնթապյանը նույնպես ծնվել է Թուրքիայում՝ Մերսինում: Ապրելով ու ստեղծագործելով Լի-Բանանում՝ նա սերտորեն կապված էր Ֆրանսիայի հետ՝ ինչպես Կոմիտասը: Եվ ինչպես Կոմիտասն է հավաքել ու գրառել հարևան ժողովուրդների՝ քրդերի ու թուրքերի ժողովրդական երաժշտության նմուշները, այնպես էլ Այնթապյանը մշակել է արաբական դաբկները՝ դրանով իր երախտագիտությունը հայտնելով արաբ ժողովրդին»:

Այնուհետև Ա. Ասատրյանը Հայաստանում առաջին անգամ նվագեց Ա. Այնթապյանի «Chatti ya dinyi» դաբկեն, որը, հայտնաբերելով Ե. Չարենցի անվան գրականության և արվեստի թանգարանի՝ Ա. Այնթապյանի արխիվում, տպագրել է կոմպոզիտորին նվիրված իր մենագրության հավելվածում: Նշենք, որ ձայնանիշերի համակարգչային շարվածքն իրականացրել է արվեստագիտության թեկնածու Տաթևիկ Շախկուլյանը: Ա. Այնթապյանի «Chatti ya dinyi»-ի կատարումը ձոնվեց այն բոլոր պետություններին ու ժողովուրդներին, որոնք հայ ժողովրդի ծանր, օրհասական օրերին նրա կողքին էին:

Համերգի երրորդ՝ եզրափակիչ մասը խորհրդանշում էր հայ ժողովրդի վերածնունդը: Լ. Արտեմյանը կատարեց Առնո Բաբաջանյանի «Պոեմը»՝ գրված 1965 թ., իսկ ավարտին՝ Արամ Խաչատրյանի «Տոկկատը» և Տիգրան Չուխաճյանի «Մեծ ֆանտաստիկ վալսը»:

Դաշնակահարուհու ծրագրի յուրաքանչյուր համար համոզիչ մեկնաբանություն ուներ և ջերմ ընդունելություն գտավ:

ԿԻՐԱԿՈՍՅԱՆ Մ. Ա.

Արվեստագիտության թեկնածու